

Isikhokelo sikatitshala IBhayibhile Yam Yokuqala

Intshayelelo

Ukukhuliswa kolwimi kwenzeka xa kuzingisiwe ekutyhilweni kwemizekelo eyiyo yolwimi. Amava kunye nomdla wabafundi kungundoqo ekukhuliseni ulwimi. Utitshala okanye umzali makabonakalise inkuthazo kunye nenzondelelo kuko konke abafundi abathi bakuthethe kwaye bakubhale. Xa utitshala efundisa abafundi kufuneka beyazile injongo yokufunda isifundo esithile, abachazele ngokunjalo ngeziphumo zesifundo eso.

Amabali akwincwadi yomntwana siwashwankathele ukulungiselela iminyaka yabantwana. Ungaphinde ubafundele ibali elipheleleyo eBhayibhileni ukuze balive lilonke okanye ulibalise lonke.

Nazi iziphumo zezifundo ekufuneka utitshala azifundise abafundi:

- Ukwazi ialfabhethi
- Ukwakha izivakalisi
- Ukuguquguqula ithoni (ukunyusa nokuhlisa ilizwi)
- Ukunika umsebenzi wokulola ingqondo
- Ukukwazi ukuphinda babalise ibali ebebelibaliselwe
- Ubuchule bokumamela
- Ubuchule bokufunda
- Ubuchule bokubhala
- Ukuzenzela izichazi-magama (iidikhshinari)
- Ukukwazi ukuhlanganisa imifanekiso neentloko zawo, nokuyilandeleanisa
- Ukukwazi ukwahlula phakathi kweyantlukwano nokufana
- Ukukwazi ukugqithisa imiyalezo

Landela izikhokelo!

Imifanekiswana engezantsi inceda utitshala nabafundi ukulandela imiyalelo yesifundo eso.



Umncedisi/utitshala uyafunda ze acacise.



Khangela - abafundi bachonga/bakhangela amagama.



Ipensili - abafundi bayabhala.



Thetha - abafundi baphinda amagama okanye baphendule imibuzo.



Funa ufumane - abafundi kufuneka bafumane izinto okanye amagama.



Ipensili enombala - abafundi bayazoba okanye bafake imibala.



Masisebenze - ibonisa umsebenzi wabafundi.



Ukuqhwaba - abafundi bayaqhwaba babale.



Ukutikisha - abafundi batikisha impendulo echanekileyo.

Isifundo 1 - Oononye

Le ncwadi ilungiselelwe abantwana abakwiminyaka emihlanu ukuya kwiminyaka esixhenxe. Abazali nootitshala besikolo seCawa bavumelekile ukuba babancedise kangangoko abantwana ukufunda. Apha abantwana banikwa ithuba lokufunda izandi nendlela ezibizwa ngayo. Kwenzelwa ukuba

abantwana bakufumane kulula ukufunda isiXhosa. Amagama amaninzi ngoononye kwaye ngamagama afumaneka onke kwiBhayibhile. Izandi zibhalwe ngoonobumba abancinci noonobumba abakhulu. Qala ubafundise oonobumba abancinci.

Titshala/Mncedisi

Undoqo wesi sifundo kukufundisa oonobumba okanye izandi. Bafundise oonobumba, bawafunde bawabhale onke amagama. Mababhale ialfabhethi beqala ngoonobumba abancinci baye koonobumba abakhulu.

Beka abantwana ngokweminyaka yabo. Aba basebancinci kakhulu, basaqala isikolo, mababhale izikhamiso a, e, i, o, u. Kulungile ukuziphinda-phinda de baziqhele. Khumbula ukuba sibaqhelisa ukuthanda ukufunda incwadi.

Isifundo 2 - Oonombini

Kuba abantwana ezinkonzweni bebewa ngeminyaka, utitshala makaqinisekise ukuba bayancedisana ukufunda amagama amatsha. Sakugqiba ukufunda oonobumba kwisifundo sokuqala, abangoononye, sidlulela koonombini noonontathu ngendlela esiwabiza ngayo amagama esiXhosa ukwenzela ukuba kube lula ukuwafunda. Bakhuthaze ukuba bakhe amanye amagama ngezandi ezo bazinikiweyo bewathetha ngomlomo emva koko bawabhale phantsi bencedisana.

Titshala/Mncedisi

Bakhuthaze bakhe izivakalisi ngamagama abawafundileyo ukuqinisekisa ukuba bayawaqonda.

Isifundo 3 - Ndim lo

Abafundi bakhuthazwa ukuzoba ukuze babe nokuzithemba. Akukho mzobo ungalunganga yonke imizobo ilungile. Babhala iinkcukacha zabo bencediswa ngootitshala, ngabazali nangabantwana bakumawabo. Bakhuthaze ukuba bakufika ekhaya, bacele abantu bakumawabo ukuba babancedise ngomsebenzi obubanike wona.

Isifundo 4 - Indalo kaThixo

Abantwana bafundiswa ngendalo kaThixo.

Bafundise ukujonga umfanekiso, baqikelele igama. Mabafunde onke amagama, emva koko bandule ukubhala amagama ngezandi abazinikiweyo: umzekelo -

Nd – indoda

Ny – inyanga

Ng – ingelosi

Isifundo 5 - Umthandazo wabantwana

Nika abantwana ithuba lokuxela izinto abanqwenela ukuzithandazela.

Titshala/ Mncedisi

Mabajonge amagama anezandi u-Ss no-Yy apha kwisifundo.

Mabongeze nawabo abawacingayo.

Isifundo 6 - Umkhombe kaNowa

Titshala/Mncedisi

Mabathethe ngomfanekiso wenqanawa kaNowa. Vumela ingxoxo ngomkhombe kaNowa.

Babonise umnyama (ireyinbhowu) baze bathethe ngemibala eyenza umnyama.

Mabazobe umnyama bafake yonke imibala eyenza umnyama.

Isifundo 7 - Unogumbe

Titshala/Mncedisi

Mabacinge zonke izilwanyana zasekhaya nezasendle.
Bakhuthaze bazobe nasiphi na isilwanyana abafuna ukusizoba.

Isifundo 8 - Yayeka ukuna imvula

Abantwana mabathethe ngokulungileyo nokungalunganga ngemvula.
Mabazobe emaphepheni imvula nazo zonke izinto ezinxitywayo xa kunetha.

Isifundo 9 - Umsebenzi wokubala

Mabathethe ngeentsuku zeveki, iintsuku zenyanga, neenyanga zonyaka. Zingade ziculwe nokukulwa.
Mabathethe ngezinto abazenzayo ngeentsuku ezahlukeneyo.
Mabazibhale phantsi iintsuku zeveki, neenyanga zonyaka.

Isifundo 10 - UMoses ucholwa emanzini

Mabathethe ngomfanekiso kaMoses. Vumela ingxoxo ngebali likaMoses. Bangenza nomdlalwana webali elo, bejonge emifanekisweni.

Isifundo 11 - UMoses uhlangu abantu bakhe amaSirayeli

Bakhuthaze bazobe ubuso obulusizi nobuso obunovuyo. Khumbula ukuba akukho mzobo ungalunganga.

Mabajongisise imifanekiso yomibini baze baqaphele izinto ezingumahluko phakathi kwemifanekiso yomibini. Banike ixesha elaneleyo lokuqwalasela izinto ezifanayo nezahlukeneyo. Zama ukuba bawonwabele lo msebenzi. Zezinye iindlela zokulola ingqondo yomntwana le. Mazifakwe isangqa izinto ezahlukeneyo.

Isifundo 12 - Imithetho elishumi

Titshala/Mncedisi

Bavumele bacengceleze imithetho elishumi, bazame ukuyicacisa intsingiselo yayo.
Vavanya ulwazi lwabo.
Banike umthetho ube mnye baqashele ukuba ngowesingaphi na. Mabayenze yonke le nkqubo ngolonwabo. Mabatreyise amanani babone ukuba kuphuma ntoni na.

Isifundo 13 - UDavide umalusi

Emva kokufunda ibali likaDavide ezincwadini zabo, mabafune bafumane iigusha zikaDavide ngokulandela umgca. Bancedise bangabetheki eludongeni. Bayakuwonwabela lo msebenzi.

Isifundo 14 - UDavide ulwa nendoda esisigebenga

Mabafundelwe ibali lendoda esisigantsontso uGoliyathi. Baphendule imibuzo ngesifundo. Mabanikwe lonke ithuba lokulinganisa indoda esisigantsontso. Emva koko bafumane amagama akwigrindi.

Vavanya ulwazi lwabo:
Banike ulwazi olungeyonyaniso, umzekelo:
UGoliyathi wayemncinane kakhulu.
Wayenobubele, elungile.
Abantu babemthanda.
Bakhuthaze abafundi bakunike izivakalisi ezichanekileyo.

Uvavanyo

Akhona amagama apheleleyo abhalwe kwigridi, banike ithuba lokuwazingela. Bakhuthaze bakhangele amagama achanekileyo okanye apheleleyo kwigridi abayinikiweyo. Khumbula ukuba basenokuthatha ixesha elide xa bezama ukufumana la magama. Yiba nomonde bade bawafumne amagama. Bancome bakufumana naliphi na igama.

Isifundo 15 - UDaniyeli neengonyama

Bafundele ibali likaDaniyeli, baphendule imibuzo bejonge emifanekisweni. Bakhuthaze bakhuphele amagama abhalwe ngamachokoza ezincwadini zabo.

Isifundo 16 - Ukuzalwa kukaYesu

Mabajonge imifanekiso yonke baqikelele konke okuthethwa yimifanekiso.
Mabafake isangqa kumagama abawanikiweyo bejonge emifanekisweni.

Isifundo 17 - Izazi zeza nezipho

Mabaxoxe ngezipho ezaphiwa uYesu zizazi:
Igolide
Imore
Intlak'emhlophe.
Yithi mabaye kubuza kubazali babo ukuba yintoni na imore nentlak'emhlophe.

Isifundo 18 - Ukuzalwa kukaYesu

Vavanya ulwazi lwabo:
Mabagqibezele amagama ngokuthelekisa igama nomfanekiso.
Bavumele bancedisane ukwakha amagama ukuze balonwabele uvavanyo.

Isifundo 19 - UHerode ufuna ukubulala usana uYesu

Bancedise bathabathe usana baye nalo eYiphutha phaya kumzobo.

Isifundo 20 - UYesu wenza umsebenzi kaThixo

UYesu uthanda wonke umntu.
Bancedise ngokubakhuthaza bathethe ngendlela abathanda ngayo uYesu. Mabakhuphele isivakalisi. UYesu uyandithanda. Emva koko benze uvavanyo bancedisana.

Isifundo 21 - UYesu usifundisa ukuthandaza

Bafundise ukuxabisa ukuthandaza njengoDavide.
Mabazame ukucengceleza lo mthandazo.
Bafundise nomthandazo kaBawo wethu oseZulwini.

Isifundo 22 - UYesu uyemka emhlabeni

Bafundel' ibali ngokucotha nokucacileyo. Buza imibuzo efana nale:

1. Wafela phi uYesu?
2. Ingaba uYesu usesengcwabeni?
3. Wavuka emva kwentsuku ezingaphi?
4. Waya ngantoni ezulwini?

Mabazobe umfanekiso womnqamlezo.

Isifundo 23

Babuze imibuzo ngeculo eli:

1. Eli culo lithetha ngabani?
2. Eli culo lisifundisa ngantoni?

Titshala/Mncedisi

- Bakhuthaze bazame ukucula eli culo ngetshanti kaWakrazulwa ngenxa yami. Baculele wena itshanti elula kaWakrazulwa ze bayisebenzise kweli culo.
- Makuxoxwe ngokubaluleka kwemfundo nenzuzo efumaneka ngokufunda. Banike ithuba lokuba wonke umntu athethe kule ngxoxo. Khumbula ukuba akukho mpendulo ilungileyo nengalunganga, injongo kukuba abantwana bakhuphe izimvo zabo.